

tia cum ipsa Dominatione Vestra Illustrissima coniunctis-
simi, ab eodem Authore humanissimè mihi dono dato, & à
me accuratè, atque verbatim perlecto; en, quid sentio, profe-
ram. Inscriptio talis est. *Demonstrata impiorum insania. Sive
Nova Copia, & Series centum. evidentium Signorum vera
Fidei, oculis subijcientium Veritatem Ecclesie Romanae, Sacrae
que Monarchiae Pontificis Maximi, Argumentis plusquam mille
debellantium Schismaticos, & Haereticos: & alijs plusquam du-
centis euerrentium directè, ac singillatim Atheos, Theistas, In-
daos, Mahometanos, Ethnicos, manifesta dementiae redargutos.*
Ex solius Inscriptionis contextu, qualis Operis maiestas sit,
& quid in Opere ipso pertractetur, quis non percipit?

Paucissima hæc scripseram, quando iterum à me perlecta
vna, atque altera præstantium Virorum sententia, initio Li-
bri præfixa; nempe P. Paulini Bernardinij Ordinis Prædicato-
rum, Sacrae Theologiae Magistri, Sacrae Congregationis In-
diciis Consultoris, & in Romana Sapientiae Vniuersitate pu-
blici Professoris: nec non P. Blasij à Purificatione Carmelitæ
Discalceati, Sacrae Theologiae Professi, ac sui Ordinis Histo-
rici generalis; qui Volumen cedro dignum censuere; cala-
mum deposui, inquiens: ad quid mea opinio, vbi duo præ-
clari Iudices sententiam protulere?

At mutato consilio, & calamo reassumpto, Archipræfulis:
Prosperi Bottinij genio indulgeo, iussionibus obtempero;
qui, vt in hac Vrbe ex Præscripto Sedis Apostolicæ Orthodo-
xæ Fidei Promotor existit; ita Lucchesinij Operis, quod ean-
dem Catholicam Fidem strenuè propugnat, Promotor euadet.

Meum itaque consilium non est, singulas insignis Operis
dotes attingendi; sed solum iuxta introductum morem in
Diarijs Literarum, & Compendijs Historicis Voluminum,
quæ de recenti in dies luci exponuntur, quæ in Gallia, Par-
mæ, & alibi Typis eduntur (& in hac Alma Vrbe, præfixo
Titulo *Giornale de' Letterati* obseruabatur), animaduertendi
quid noui ferat.

Arduum sanè videtur aliquid noui in Materia afferre,
quam Authores plurimi pertractarunt, & in qua laus ab alia

re quærenda non est, quàm à soliditate, & diligente Illa, quæ magis prosint ad veritatem patefaciendam. Attamen si post tot Sanctos Doctores, & alios, qui de hoc egerunt, potuit Thomas Bozius Volumina duo conscribere *De Signis veræ Ecclesiæ*, & centum eiusdem Ecclesiæ Signa afferre; etiam alij totidem possunt recensere.

Hoc sane præstitit Author noster; quia noua plerumque sunt Signa ista: noua series: noua Argumenta probantia veritatem, & efficaciam Signorum: nouus modus elegans, & figuratus, quo afferuntur: noua modestia, qua, nihil lædendo Nationes, solum Impiarum Sectarum duces condemnat.

Quoad Signorum nouitatem, qui Bellarminum, Granatam, Bozium, & alios, hoc Argumentum pertractantes, perlegerunt, animaduertent, ferè nihil ab ipsis nostrum Authorem mutuatum fuisse, præterquam vbi ipsos allegat.

Series est penitus noua, vt statim obseruare poterunt percurrentes Indicem Signorum Bozij, quem Author affert in calce Epistolæ ad Lectorem; & Indicem Signorum ipsius Authoris, qui solum coincidit cum septem, aut octo ex illis, quæ à Bozio traduntur; ac diuersissimam ab illo methodum feruat.

De nouitate Argumentorum statim eruditis constabit; licet enim aliqua ex ijs ab alijs allata fuerint ad particulares Controuersias soluendas: attamen adhibita non sunt ad statuenda generatim Signa veræ Fidei; inter quæ vnum præcipuum est Authoritas visibilis Ecclesiæ, quam validissimè demonstrat, recensendo ex ipso Facto, non ex Iure, Experimenta innumera Pontificiæ Potestatis, tam in Oriente, quàm in Occidente.

In his conglobandis experimentis, & ad suas Classes reducendis, insignis etiam nouitas fulget, cum nihil simile in alijs à me repertum fuisse Scriptoris meminerim.

In Historia ipsa omnem nouitatem exhorret: sed consecratur Authores in Ecclesia receptissimos, Græcos, & Latinos, præsertim Sanctos, idèoque maximæ authoritatis: ac etiam hostes, in quantum Catholicæ Ecclesiæ fauent, videlicet an-

tiquos Hæreticos, & Schismaticos, Eusebium, Socratem, Sozomenum, Zonaram, Nicephorum Callystum, Photium, aliosque huiusmodi; ex quibus magna vis peritur ad stabiliendam Catholicam Veritatem; quam præterea fundat præsertim Author ex Actis Generalium Conciliorum, quæ in Græcia celebrata sunt.

Licet autem in Historia nouitatem quoad res ipsas omni studio viter; plurimam tamen lucem sua methodo eidem Historiæ affert, præsertim vbi agit de seminibus, & origine præcipuæ rebellionis à Romano Pontifice, scilicet Orientalis, quam alij à Photio incæperunt. Ipse autem à supradictis, & alijs recentioribus, sed probatissimis Scriptoribus, Allatio nempe, Cariophylo, Arcudio, alijsque ostendit, ante Photium initas fuisse septem velitationes, & initia pugnæ à Græcis cum Latinis: atque ipsas discordias antecedentes, & consequentes in sexdecim diuidit.

Nouum etiam est, ex ipsis initijs, & progressibus rebellionis Schismaticorum argumenta falsitatis eiusdem Schismatis eruere, & à fortiori Hæresum.

Præterea lucem magnam affert Quæstionibus multis Ecclesiasticis, huc vsque agitatis; & manifestas reddit res, quæ adeo claræ non videbantur.

Elegantia verò, atque eloquentia, qua medelam affert veneno Authorum recentium hæresum, qui plurimos lepore styli deceperunt, in hac materia penitus noua est; & vix in alijs materijs inuenitur Author, qui tantam rerum facundiam exhibeat, congregando plurimas, & non repetendo easdem inanibus verbis, atque ad legendum alliciendo, noua eruditionum copia semper allata, non ad pompam, sed ad argumentum roborandum.

Exhortationes, quas in fine quarti Libri, & in quinto affert contra septem species errantium in Fide, videlicet Schismaticos, Hæreticos, Atheos, Theistas, Iudæos, Mahometanos, atque Ethnicos, licet in Paragraphos diuidantur, maioris claritatis gratia, atque vt magis series Argumentorum appareat; attamen coniunctæ constituunt Orationes insignes,
plu-

plurimis Argumentis contextas: verbi gratia octoginta quatuor contra Atheos, ac Theistas; quæ totidem sagittæ videntur, ad salubriter ipsorum animos vulnerandos.

Nouum pariter est, quod, Infideles impugnando, ab Atheis non incipiat, vt fieri solet; sed expendi; opportunum fuisse, prius centum Signa Veritatis contra illos afferre, qui minus à Nobis discrepant, Schismaticos videlicet, & Hæreticos, ac deinde seligere ex istis ea, quæ valent etiam contra alios veræ Religionis aduersarios.

Nullus præterea (quod nouerim) impugnauit (non solum indirectè, scilicet probando Veritatem Catholicæ Fidei; sed etiam directè, afferendo Signa eiusdem Fidei contra singulas Sectas) errores earundem singularum Sectarum: quod adeo efficaciter hic præstatur, vt Atheos, verbi gratia, atque Theistas à nullo tam solidè, ac patenter profligatos viderim.

Id certè, quod in Operis Titulo promittit; videlicet à se demonstrandam Impiorum insaniam, egregiè implet: tum quia plurima ex Argumentis sunt demonstratiua; tum etiam (& multò magis) quia ex omnibus, quæ contra singulas Sectas intorquet, resultat Demonstratio plus quàm moralis; quæ potius (vt Author notat) Metaphysica videtur dicenda: nec sanè potest dari, quod non sit vera Fides illa, quam Deus Omnipotens tot Signis ostendit esse verissimam, scilicet Romanam: Diuina siquidem Maiestas perpetrare nequit Miracula ad homines decipiendos, vt optimè animaduertit Author.

Ipsè Titulus Operis aliquibus nouus videri potest; sed plurimi sunt, qui Demonstrationes appellant Signa Fidei, constituenta euidentem Credibilitatem, & Credenditatem, scilicet euident Meritum, & Obligationem credendi. Quod autem Impij appellentur Insani, vetustissima res est; & ipsi omninò putant, tale sibi à Nobis nomen tribui, vt illis tributum est à S. Ioanne Chrysostomo, alijsque plurimis.

Hoc denique Opus non solum omnibus impijs, si ab illis expendatur, summopere prodesse poterit, & proderit: sed etiam Controuersistis, & Missionarijs ad omnes Infideles.

Iuvenes autem qui Rhetoricæ student, habebunt hîc Florilegium formularum, præsertim pro rebus sacris, atque nervosæ facundiæ exemplar, affluentis copia rerum illustrium. Ac demum Catholici omnes motiua inuenient, ex quibus validè confirmabuntur in Sanctissima Religione, cuius in sinu suauissimè conquiescent.

Hæc habui, quæ sincerissimè (hoc est meo more) scriberem ad Illustrissimam Dominationem Vestram; quam enixè precor, vt ipsi Patri Lucchesinio stimulum addat, quantò citiùs præclarum Opus *De Concilijs* prælo tradendi. Et Archiepiscopi Bottinij sacratas manus deosculor; eique à Deo Opt. Max. fausta omnia precor. In Vrbe. Die xxiv. Mensis Iunij. Anno Reparatae Salutis MDC LXXXIX.

Dominationis Vestrae Illustriss. ac Reuerendiss.

Addictiss. & Obsequentiss. Seruus

Carolus Cartharius.

2

AD ILL.^{MVM} AC REV.^{MVM} D.
PROSPERVM BOTTINIVM
Archiepiscopum Myrensem, & Fidei
Promotorem, Sanctique Officij
Consultorem.

R.^{MI} P. D. CAIETANI PASSARELLI
CLERICI REGVLARIS
Sanctæ Romanæ Vniuersalis Inquisitionis
Qualificatoris, & Catholici Regis
à Concionibus

Censura Libri, qui inscribitur

DEMONSTRATA IMPIORVM INSANIA.



LACVIT tibi, Illustrissime, ac Reuerendissime Domine, eo mecum imperio vso, quod reperitis titulis, iuribusque exercere debes, ac potes, imponere mihi, vt Librum euoluam, nuper luci publicæ traditum ab Adm. R. P. Lucchesinio è Societate IESV, non minus tibi claritudine generis per arctam cognationem, quàm virtutum, morumque splendore coniuncto; cumque Viri huius Curiaë doctissimi præclare, ac magnificè, vt par erat, de eodem Opere censuissent, mihi etiam præcipis, vt primarijs me viris immisceam, & calculum quoque meum, in urnam iniiciam. Obedientiæ itaque conditioni meæ propriæ, & obsequij merito prælucente, auidos legendi admoui oculos, si in argumento fortasse multitudine Auctorum, ac serie excusorum Librorum adeò trito, reuolutoque, ac propè, vt ita dicam, effæto, noui quidquam, & peregrini interlucere posset, quod ingenium illustraret, & Voluminum similitudine, & copia nauseantem ferè iam animum recrearet.

Porro hæsi primùm, nec minus attentè, quàm iucundè, in

fronte, ac Titulo Libri. *Demonstrata Impiorum Insania*. Infanos quippe vocat Hæreticos, & Schismaticos, & lutulentas alias Sectas, ab aureo Diui Chrysostomi fonte aduersus Hæreticos hoc pulchro epitheto mutuato: quo nihil reuera proprius, & congruentius aptari Hæreticorum sensibus potest. Concilium quippe Constantiense plerasque Ioannis Wiclephi assertiones *Insanas* appellat, & Ioannes 22. in Extrauaganti: *Gloriosam*: erroribus Henrici de Sena, & aliorum Sectariorum *Insania* notam inurit, idque passim ab alijs Pontificibus usurpari, dum anathematum fulmina Hæreticis iaciunt, videre facile est: cum enim Hæresis, siue Schisma sit error fixus in intellectu, ipsam, cui inhæret, intelligentiam corrumpit, ac prope cerebrum labefactat. Prolusionem totius Operis Auctor à Fide Diuina petit; disertè quidem eius extricando Mysteria, cuius Signa velut radii inde manantes prodere statuit: in quorum explanatione Mysteriorum, & per veli opacum passim doctrinæ suffusa luce, maximè me delectant viuida quædam exempla, quibus obstrusiora Fidei latibula, intimosque recessus eloquentissimè aperit, ac penè subijcit oculis. Inter alia, ne omnia præteream, illud floret exemplum, quod Iudex certè, & cum euidencia credibilitatis procedit ad sententiam supplicij, non viso, nec palpato crimine rei, sed testium duntaxat incorrupta fide subnixus. Ceterùm ideo moralis doctrina Socratis super omnes morales Philosophos à Platone, & Xenophonte summis laudibus celebratur, quia moralia ille præcepta per vulgaria exempla, ac similitudines fundens veram virtutis pulchritudinem velut spirantem oculis exhibebat. Accedunt quoque huic Fidei explicationi quædam lumina Sanctorum Patrum, ac flores sententiarum, Theologorum rationibus interposita, quæ magis doctrinam corroborant, & illustrent. Hæc de quasi prologo Operis.

Totius libri series ex centum euentibus Fidei nostræ Signis conflatur. Pleraque Signa Noua sunt, nec à Bozzio, nec ab alijs, qui latè de hoc argumento scripserunt, animaduersa. Hæc omnia ad quatuor capita, siue fontes, vnde multiplices doctri-

doctrinæ, & eloquentiæ riuuli effluunt, suo ordine reducuntur, nimirum quod Ecclesia Romana sit Vna, quod sit Sancta, quod sit Catholica, seu Vniuersalis, quod sit Apostolica. Huiusmodi rituli, & nomina sub distinctis Libris, articulisque latissimè complectuntur, quod Romanus Pontifex sit Ecclesiæ Monarcha, legitimus Sacræ Scripturæ Interpres, Supremus Iudex in causa Fidei, Infallibilis, & irrefragabilis, Caput & Rector Vniuersalis Ecclesiæ, & Superior Vniuersali Concilio; ita ut aduersus illas Assertiones à Clero Gallicano recentè obiectas, & quantum deinde in earum fauorem scripsit Maymburgus, alijsque Recentiores, quædam velut Officina ostendatur, in hoc Opere elaborata, ex qua cudi, arripi, acui tela, ac vehementer torqueri in Nouitatis interitum possint. Præsertim cum in doctrinæ adminiculum adsint solidæ, nec tritæ Patrum sententiæ, quas hætenus non vidi ab alijs Auctoribus allegatas, simul Sacræ Scripturæ sensus mirificè elucidati, simul etiam in allusione proprietatis, neruus in sententia, acumen in doctrina, robur, & vigor in argumento, concentus in ordine, amænitas in dictione, candor in eloquio, ita, ut styli aculeum Hæreticus, & Schismaticus sentiat, & mella ibi quoque degustet lector. Porro autem elegantes quasdam Patrum sententias, reconditasque doctrinas vel aceruatim, vel obliquè, vel perfunctoriè, & quasi per transitum tanquam lapillos Auctor interdum incuriosè iacit, ut nonnisi eruditissimus vir, & in materia longè versatus animaduertere, aut legere omninò sciat.

Aduersus Hæreticos eleganter, & acriter Opus inuehitur, & præsertim in illam ab ipsis, & fatuè, distinctionem confictam, quæ alios statuit Fidei *Fundamentales* Articulos, quales in Apostolico, & Nicæno Symbolo continentur, alios *Accessorios*, & in illis se cum Catholicis conuenire, in his verò discrepare, parum, aut nihil momenti esse: quæ quidem impia distinctio, & chymerica ratio nunc in Anglia, & Germania vigens, cladem ingentem edit, id propterea discriminis inter Catholicos, & Hæreticos statuendum, quod inter diuersa Theologorum Gymnasia interest: quæ nefaria distin-

ctio

ctio hic doctè, nervosè, & peracutè conuellitur. Obiectan-
tur hic etiam, & copiosè Hæreticis Nouitates, antiquis Ec-
clesiæ, & Patrum Traditionibus aduersantes, & post longum
circuitum eò impudentiæ, atque insanix redacti ostenduntur,
vt iam illi conuicti, id nunc credere Ecclesiam, quod Sancti
Patres Latini, Græciq; superna luce tradiderint, has Catholi-
cas Veritates in Sanctorum Veterum Patrum libris expressas,
naus, siue Patrum *errores* dicere petulanter, & impiè non
erubuerint. Quod idem est, ac dicere cogi, quod errore lap-
sus est Athanasius, quod desipuit Chrysostomus, quod calig-
gavit Ambrosius, quod offendit Gregorius, quod delirauit
Augustinus: quæ in eisdem retorta illatio in hoc etiam blas-
phemos validè sternit. Longè præterea, latèq; in Opere
patet, carere Hæreticos Spiritus Sancti assistentia, propheti-
co dono, miraculis, morum temperie, puritate doctrinæ, de-
core virtutum; imo omnia veriùs per præstigia, per fucos, &
fraudes agere, logomachiam, & homonymiam, & circula-
tionem in omnibus exercentes. Sed singularis, & egregius
inter reliquos eminet ille tractatus in pagina 428. vbi Regulæ
plurimæ consignantur ad omnes hucusque exortas, & exori-
turas quoque Hæreses labefactandas, & quasi quoddam in
illo Armamentarium instruitur, quo per diuersa armorum ge-
nera, singula singulis erroribus apta, omnes Nouatores cum
nouitatibus proteruntur.

Vehementior tamen ab Auctore cum Schismaticis pugna
conferitur, & primùm concinna, atque lepida historiæ me-
thodo quærens, quod non fuerit Schismatis causa, scilicet
non certamen Sancti Papæ Victoris de Paschate cum Asiati-
cis, non Sancti Stephani Papæ cum Diuo Cypriano de reite-
rando Baptismo dissidium, non querela Græcorum aduersus
Latinos de Processione Spiritus Sancti per additam Symbolo
particulam *Filioque*, non scissio Romani Imperij, dam rerum,
singulas rationes, causasque affluenter percurrit, & grauitè
excutit, antiquiora Ecclesiæ Veteris monumenta, & notitias
insignes tum profanæ, tum Ecclesiasticæ historiæ aperit, ac
propè subijcit oculis: deinde expositiō sensu reciprocans,

veramque Schismatis causam exponens, alios historicos fontes, & Annalium diuicias exerit, nec minus doctrina instruit, quam vbertate rerum, & copia animos pascit: iudicio quoque incorruptus, & integer, electione in proposito melior, cum potissimam Schismatis causam refert ad Photium, perditamque Bardæ luxuriam, exemplo videlicet ab Anglicano Schismate repetito; sicut enim Anglia propter Henrici Regis impudicitiam, qui legitimas Catharinæ adulterinis Annæ Bolenæ nuptijs postposuit, ab Ecclesia defecit: ita superinducta pellex à Barda in expulsæ Coniugis locum, & assentatio Photij, qui creptas idcirco Ignatio, qui facinori obstabat, Insulas intercepit, pessimum Schisma comparauere. Quo Auftore nemo profectò melius mihi videtur in originem Schismatis collimasse; nam scelera vt plurimum ex libidine orta, mutationem regiminis inuexere, rerumque sublunarium euentus veteres noui, ac nouos vetères excipientes, fluxu, refluxuque perpetuo tanquam in Orbem circumferuntur.

In iisdem autem Schismaticis oppugnandis, conferto pede, & breuib; sed ineluctabilibus, & quasi fatalibus armis Auftor videtur incumbere, ad illius adagij similitudinem: Quod iam res ad Triarios peruenit; quando scilicet eò pugnæ calor, ardorque deuenit, vt extremo conatu, summisque viribus agitur. Irrefragabilia inter cætera, nec fortiora librari posse ego arbitror argumenta, sunt. Quod Ecclesia Schismaticorum nullo ordine, nulla vnitæ compaginatur; pars enim Constantinopolitano Antistiti, altera Alexandrino, hæc Antiocheno, illa Hierosolymitano seorsim obedit, nulla ab altera ad alteram prouocatione recepta, singulis velut Insulis à continente, communique consortio rescissis. Quod acris, certamina, & æterna prope diffidia eosdem Schismaticos distrahant, atque diuellant, cum & illos nec certa Regula, lex teneat de Ritibus, & cæremonijs, de Ecclesiastica disciplina, de Dogmatibus Fidei, quasi nauës sine clauo, sine Rectore, sine Duce in alto gurgite fluctuantes. Quod tandem ipsa rei Nouitas, quæ nec placuit Diuo Athanasio, nec Basilio, nec Gregorio Nazianzeno, nec Chrysostomo, alijsque inelytis

viris,

viris, & Græcis, qui subiectionem, & vnitatem cum Ecclesia Romana coluerunt, per se ipsa suspecta, vt Nouitas, est. Tanti enim valet argumentum à Nouitate ductum, vt D. Augustinus contra Academicos agens, & præsertim contra eos, qui asserebant, animam rationalem produci è potentia materiæ, his tantummodò verbis confutauit: *Ipsa Nouitas displicet.*

Hæc omnia quoque doctrinæ lumina in centum Signa, & veræ Fidei tesseras sparsa, supra mille argumenta ab Auctore prolata excipiunt, eandem veritatem corroborantia, & lucem doctrinæ addentia; vt quidquid de hac materia ratiocinando, arguendo scripserint Bellarminus, Bozzius, Sanderus, Bouerius, & alij, ex composito, vel per transuersum nedum complectatur hoc Opus, sed etiam plurima noua adijciat, nouasque latebras detegat tum ad Nouatores confodiendos, tum ad effugia fraudibus præcludenda. Inter hæc singulare, & rarum quoddam occurrit, & animaduersione maxima dignum. Id porro est, quod præcisè non negat Auctor, Miracula apud Schismaticos esse, nec illud propterea omninò refellit, quod in Oriente contingere narrant Schismatici, per excommunicationem scilicet à Schismaticis Episcopis latam, sæpè sæpius defunctorum corpora intumuisse: & hanc ibi Auctor rationem assignat, quia potest Deus ea ordinare Miracula, ne illi à Schismate (quod minus malum, cum Ecclesiæ Sacramenta non respuat, esse videtur) ad impietatem Mahometicam deuoluantur. Quæ quidem sententia prima facie difficilis esse videtur, & Baronij doctrinæ opposita anno Christi 34. asserentis, Miracula esse dotem à Christo Catholicæ tantum Ecclesiæ legatam, & in veritatis attestationem proposita. Schismatici verò sunt extra Ecclesiam Catholicam, vt ab illa separati: carent etiam iurisdictione ad valorem censuræ necessariam, vt docet de Schismaticis Diuus Thomas. 2. 2. q. 39. art. 3. vnde lata ab illis excommunicatio cum nulla sit, nec metuenda, absurdum est quoque dicere, quod Deus in confirmationem violentæ, iniquæque sententiæ miracula faciat. Nihilo tamen minus Auctoris doctrina constat, nam Baronius ibi videtur loqui de Hæreticis, & hic

Auctor patenter loquitur non de Hæreticis, sed Schismaticis, prout Schismatici sunt, qui iuxta doctrinam D. Thomæ in eadem quæst. art. 1. non sunt formaliter Hæretici. Nec illa Miracula edita asserit Auctor in Schismatis, vel usurpatæ iurisdictionis probationem; sed, inter alias causas, ne Schismatici in Mahometismum præcipitentur. Sicuti Deus cauſando materiale peccati permittit duntaxat malitiam illi annexam, propter fines, qui pertinent ad Prouidentiam vniuersalem. Terrorem præterea per illud prodigium censuræ comparatum intelligit Auctor pro Censura in suo genere considerata, non pro tali censura, quæ ob defectum iurisdictionis est nulla; quod tantum perfunctoriè delibatur Auctor, cum ipse ex professo loquens luculentius argumentum excutiat.

Amplius ego adijcio, ad vberiore doctrinam, & maiorem Auctoris sententiæ firmitatem, Theodoretæ auctoritatem apud Anastasium Episcopum Nicænum in tomo primo Bibliothecæ Patrum editionis Parisiensis 1589. iam expurgato per correctionem Romanam editam sub Paulo V. anno 1607. quæ ita se habet: *Quando ergo videris, & per Hæreticos, & per Incrédulos fieri aliquod signum, ne obstupescas, aut à recta Fide dimouearis; sæpè enim etiam eius, quæ accedit, Fides, ea est, quæ Signum facit, non eius, qui fecit, dignitas.* Et paulò post addit: *Multis enim sæpè non solum Orthodoxi peccatores, sed etiam Hæretici, & Infideles fecerunt Signa, & prophetarunt, cum Diuina quadam dispensatione, ut diximus, eis esset concessum: ut in Balaam, & Saule, & Nabuchodonosor, & Caipha, licet inuenire, propter causas rationi consentaneas.* Multa ad rem congeri possent; sed hæc dixisse sufficiat, ut pateat, quod, si noui quidquam, aut peregrini in hoc Opere inseritur, inconcussa ratione, & solido fundamento firmatur.

Aliud etiam est, quod in hoc Libro mihi maximè placet, quod eius scilicet Auctor non repudiat, sed libenter admittit, & probat Epistolas Decretales Summorum Pontificum, etiam quæ à Papa Clemente Primo vsque ad Siricium enumerantur, circa quas Nostrates nimis leues, ac faciles ad eas reiiciendas, præterquam quæ in Actis Conciliorum, & apud
pro-

probatos Auctores recitata reperiuntur, aliquorum argutijs, speciosisque argumentis celeriter, & inconsultò manus dedere, minimè attendentes, eadem quoque argumenta posse applicari epistolis Diui Augustini, Hieronymi, Tullij, Plinij, quarum pauca, quæ videntur adiectitiæ; & intrusæ reliquas vitiare nequaquam possunt; præsertim cum errore scriptorum per vitium antiquitatis aliqua in aliquas irreperere absurditas potuisset. Sic & immeritò quidem, à nonnullis rejicitur Liber Diui Thomæ de Regimine Principum propter personam ibi allegatam, Diui Thomæ temporibus minimè congruentem: quod tamen errore scriptoris, qui ad dilandam temerè argumentum per hanc additionem, Textus veritatem corruptit, id euenisse constat; siquidem tale mendum, erratumque in Originali eiusdem Diui Thomæ, quod extat in Bibliotheca Vaticana, non inuenitur. Gratulor igitur nostro Auctori, & gratias ingentes ago, quòd eas Epistolas asserendo meretur benè, & præclare de Apostolica Sede, cùm Primatus Romanæ Ecclesiæ, & Suprema Romani Pontificis Auctoritas nullibi vehementius, & clarius, quàm per has Epistolas innotescat: eaque propterea sollicitudo, quæ Romanæ Ecclesiæ æmulos premit ad illas Epistolas contemnendas, ac reprobandas; vrgere studiosos deberet ad easdem tuendas, & confirmandas.

Id præterea, quod Auctor contra Græcos de Processione Spiritus Sancti tum historicè, tum theologicè exponit, tanta copia, eruditione, & vbertate doctrinæ spargit, vt neminem profectò viderim, qui exactius, ac luculentius hanc materiem excusserit. Probat enim, ante Concilium Generale Primum Constantinopolitanum neminem Græcorum negasse Spiritum Sanctum à Patre, Filioque procedere; ideoque hunc Articulum in illa Synodo manifestè sancitum, aut declaratum non fuisse. Accedere quoque Patrum Græcorum, qui ante, & post illam Synodum floruerunt, consensum, per varias Similitudines, Symbolos, & Metaphoras, eandem Emanationem, ab Vtraque Persona disertissimè attestantium: iugularam deinde hanc Hæresim fuisse in Concilio Ephesino Primo inter alios

alios Errores Nestorij, & huic damnationi denique subscrip-
sisse Quartram, Quintam, Sextam, & Septimam Synodum Ge-
neralem: & alia huiusmodi, quæ ad rem faciunt, ea amplitu-
dine, doctrinæque soliditate peragit Auctor, ut nihil excusan-
dum apponat, nihil in proposito desiderandum omittat.

Postremò Auctor ad quinque Infidelium genera, nempe
Atheos, Theistas, Iudæos, Mahometanos, & Ethnicos, per
distinctas Paræneses conuersus, eos robustis, constipatisque
argumentis à naturæ ordine, à dictamine rationis, à disciplina
morum, ab implicantia rerum, aliisque locis elegantissimè
ductis, & simul eloquentiæ velut flumine obruit. Equidem
tamquam in amœnum, ac mirificè excultum viridarium in-
gressus ex scintillantium vasta segete florum aliquos carpat, &
velut in fasciculum ducam. Contra Atheos, ac Theistas,
inter alia multa sapienter ostendit, euincitque necessitatem
Primæ Causæ, & illorum insaniam, qui ex fortuita Atomorum
colluie Mundum constatum, casuque omnia fluere, somnia-
uerunt: simul qui Naturam esse fatentur, & omnia in Naturam,
eius Auctore dementer excluso, coniungunt. Iudæos præci-
puè verberat, & confundit Talmudicæ doctrinæ fœditate, ab-
surditate, & amentia: Mahometanos pugnantibus inter se
theorematis Alcórani, fabulis etiam, nugis, ineptijs, affe-
ctata ignorantia, obstinato silentio de Lege, impuritate, ob-
scænitatem morum ac vitæ. Ethnicos pluralitate Deorum per se
impossibili, & in coopertis sceleribus Dijs ipsa scelera vene-
rantes, adorantesque. Atque in hac argumentorum struenda
mole Scientificè, ac Demonstratiuè ut plurimum Auctor incum-
bit; ita ut ibi arcana patentia naturæ Physicus, ingenij acumi-
na Metaphysicus, nodos ac tricas inextricabiles Logicus,
flores & lumina Rhetor inueniat. Hæc de Opere in suas par-
tes diuiso, expensoque, dicere occurrit.

De toto vero, integroque Volumine. Stylus Latinus tota
elocutione, & ornamento grauis, vegetus, & ita floridus est,
ut inter Patres Societatis, in hoc dicendi genere florentissimæ,
nulli hac tempestate secundum esse censeam: simul densus in-
sententijs, modestus in Censura, sanus in Iudicijs, & Arte
tam:

tam benè expolitus, & cultus, vt narrando quoque doceat, ac velut tacitè instruat. Tanta præterea rerum plenitudine, & Copia, in breui, pressa, & concisa oratione, restringitur, vt cumulata abundantia doctrinæ plures huiusmodi Libros conficiendi explicatori, liberiorique eloquentiæ, ac fufiori stylo, satis argumenti dedisset. Legat illum Missionarius, legat Controuersista, legat Catholicus, & Hæreticus, legat Doctus, & Indoctus. In his literarum nundinis omnia, & opulenter parata pro omnibus sunt.

Hæc habui, Illustrissime, ac Reuerendissime Præsul, quæ pro mea sententia de hoc elegantissimo, & eruditissimo Libro exponerem, vi tamen tuæ iussionis adstrictus; verebar enim, ne mihi in suffragium ituro meritò illud obijceretur, quod de Concione Atheniensium vir quidam præclarus asseruit, quod scilicet ibi sapientissimus quisque diceret, infusus verò sententiam ferret. Vale, & optimè vale. In Ædibus S. Siluestri Montis Quirinalis de Vrbe die 26. Iulij 1689.

Dominationis Tuæ Illustrissimæ, ac Reuerendissimæ.

Humillimus, & Studiofissimus Seruus

D. Caietanus Passarellus C.R.

tam benè expolitus , & cultus , vt narrando quoque doceat ,
ac velut tacitè instruat . Tanta præterea rerum plenitudine ,
& Copia, in breui, pressa, & concisa oratione, restringitur, vt
cumulata abundantia doctrinæ plures huiusmodi Libros con-
ficiendi explicatori, liberiorique eloquentiæ, ac fufiori stylo,
fatis argumenti dedisset . Legat illum Missionarius , legat
Controuersista, legat Catholicus, & Hæreticus, legat Doctus,
& Indoctus . In his literarum nundinis omnia , & opulenter
parata pro omnibus sunt .

Hæc habui, Illustrissime, ac Reuerendissime Præsul, quæ
pro mea sententia de hoc elegantissimo, & eruditissimo Libro
exponerem, vi tamen tuæ iussionis adstrictus; verebar enim ,
ne mihi in suffragium ituro meritò illud obijceretur, quod
de Concione Atheniensium vir quidam præclarus asseruit,
quod scilicet ibi sapientissimus quisque diceret, infusus verò
sententiam ferret . Vale, & optimè vale . In Ædibus S. Sil-
uestri Montis Quirinalis de Vrbe die 26. Iulij 1689.

Dominationis Tuæ Illustrissimæ, ac Reuerendissimæ .

Humillimus, & Studiofissimus Servus

D. Caietanus Passarellus C.R.